

ԱՐՁԱՆԱԳՐՈՒԹՅՈՒՆ ԹԻՎ 90

«ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆ» ՀԻՄՆԱԴՐԱՄԻ ԻԶԵՎԱՆԻ ՄԱՍՆԱՃՅՈՒՂԻ
ԳԻՏԱԿԱՆ ԽՈՐՀՐԴԻ ՆԻՍՏԻ

07-ը մայիսի 2026թ.

Նիստին ներկա էին գիտական խորհրդի 35 անդամներից 26-ը (քվորումն ապահովված էր):

Նիստը վարում էր գիտական խորհրդի նախագահ Մ. Մ. Օթարյանը, նիստի քարտուղարն էր Մ. Ս. Աթոյանը:

ԵՊՀ ԻՄ գիտական խորհրդի նախագահ Մ. Մ. Օթարյանը քվեարկության դրեց նիստի օրակարգը:

ՕՐԱԿԱՐԳ

1. ԵՊՀ ԻՄ զարգացման 2025-2030թթ. ռազմավարական ծրագրի 2025թ. գործողությունների պլանի կատարման մասին:
(Ձեկուցող՝ ԵՊՀ ԻՄ գիտական խորհրդին կից որակի կառավարման մշտական հանձնաժողովի նախագահ՝ Ա.Հ. Մակարյան)
2. ԵՊՀ ԻՄ-ում հետազոտական աշխատանքների իրականացումից և գնահատումից ուսանողների բավարարվածության հարցման արդյունքների մասին (2025-2026 ուստարվա 1-ին կիսամյակ):
(Ձեկուցող՝ ԵՊՀ ԻՄ գիտական խորհրդին կից որակի կառավարման մշտական հանձնաժողովի նախագահ՝ Ա.Հ. Մակարյան)
3. ԵՊՀ ԻՄ 2027թ. ընդունելության մասնագիտությունների ցանկի քննարկում:
(Ձեկուցող՝ ԵՊՀ ԻՄ տնօրեն Մ. Ս. Օթարյան)
4. ԵՊՀ ԻՄ Տուրիզմի կառավարման և մշակութաբանության ամբիոնի ասիստենտ, տնտեսագիտության թեկնածու Սմբատ Ցուցույանին ԵՊՀ գիտական խորհրդում դոցենտի գիտական կոչում ստանալու համար երաշխավորելու և միջնորդելու մասին:
(Ձեկուցող՝ ԵՊՀ ԻՄ գիտական քարտուղար Մ. Ս. Աթոյան)
5. Ընթացիկ հարցեր
5.1. «Երևանի պետական համալսարան» հիմնադրամի Իջևանի մասնաճյուղի օտար լեզուների ամբիոնի դոցենտ Մարատ Զուրաբյանի և Հայոց լեզվի և գրականության ամբիոնի դոցենտ Մուշեղ Սարուխանյանի համահեղինակությամբ «Բառերի բուլգակոմյան աշխարհը. Ռուս-հայերեն ստուգաբանական բառարան» ձեռնարկը երաշխավորելու մասին:
(Ձեկուցող՝ ԵՊՀ ԻՄ մեթոդական խորհրդի նախագահ Ա. Հ. Մակարյան)

Բաց քվեարկությամբ՝ 26 կողմ, 0 դեմ, 0 ձեռնպահ համամասնությամբ որոշվեց.
ՈՐՈՇՈՒՄ

➤ Հաստատել նիստի օրակարգը:

Օրակարգի առաջին` «ԵՊՀ ԻՄ զարգացման 2025-2030թթ. ռազմավարական ծրագրի 2025թ. գործողությունների պլանի կատարման մասին» հարցի վերաբերյալ լսեցին ԵՊՀ ԻՄ գիտական խորհրդին կից որակի կառավարման մշտական հանձնաժողովի նախագահ` Ա.Հ. Մակարյանի հաղորդումը:

Նա մանրամասն ներկայացրեց ԵՊՀ ԻՄ զարգացման 2025-2030թթ. ռազմավարական ծրագրի 2025թ. գործողությունների պլանի կատարողականի վերաբերյալ մանրամասն տվյալները:

Նշվեց, որ 2025 թվականի համար նախատեսված է եղել 38 գործողություն, որոնց իրականացման ընթացքը փաստաթղթավորվել է Google Disk հարթակում իրականացվող օնլայն մոնիթորինգի միջոցով: Իրականացվել է 7 գործողություն (18.4%), ընթացքի մեջ է` 23 գործողություն (60.5%), որոնց մեծ մասը շարունակական բնույթ ունի և նախատեսված է մինչև 2030 թվականը, իրականացվել է մասնակի` 2 գործողություն, չի իրականացվել` 6 գործողություն:

Մասնագիտական կողմնորոշման շրջանակներում իրականացվել են այցեր մարզի 12 դպրոցներ, կարդացվել է 31 դասախոսություն, և կազմակերպվել են ճանաչողական այցեր 328 աշակերտների համար: Օլիմպիադաներին մասնակցել է 177 աշակերտ: Ստեղծվել է մասնագիտական կողմնորոշման ձեռնարկ: Հաշվետու ժամանակահատվածում հրատարակվել է 28 գիտական աշխատանք, որոնցից մեկը` Scopus շտեմարանում, 12-ը` ԲՈԿ-ի կողմից ընդունելի պարբերականներում: Կնքվել են միջազգային նոր հուշագրեր Ղազախստանի, Ռուսաստանի և Գերմանիայի բուհերի հետ: Մշակվել է մասնաճյուղի «Բաց գիտության» քաղաքականությունը: Վերանորոգվել են վարչական մասնաշենքի միջանցքները, բակը և երկրորդ մասնաշենքի տանիքը: Բոլոր լսարաններում տեղադրվել են հակահրդեհային համակարգեր, իսկ երեք լսարաններում` տեսաձայնագրման համակարգ: Թարմացվել է շրջանավարտների տվյալների բազան (ընդգրկված է շուրջ 5000 շրջանավարտ), տրվել է 135 հաղորդագրություն թափուր աշխատատեղերի վերաբերյալ, և 20 շրջանավարտ ուղղորդվել է աշխատանքի:

Նշվել է ստորաբաժանումների կողմից հաշվետվությունները թերի կամ ուշացումով ներկայացնելու խնդիրը: Օրինակ` Բնագիտական ֆակուլտետը չի պատասխանել 13 գործողության, իսկ Ուսումնամեթոդական վարչությունը` 10 գործողության վերաբերյալ:

Գիտահետազոտական նախագծերում դասախոսների (4.8%) և ուսանողների (0.27%) ներգրավվածությունը մնում է խիստ ցածր: Չի մշակվել «Կանաչ համալսարան» հայեցակարգը և չեն իրականացվել պիլոտային ծրագրեր: Բացակայում է նաև աշխատակազմի գործունեության գնահատման համակարգը և էլեկտրական ենթակառուցվածքների ծանրաբեռնվածության տեղեկատուն: Չի ստեղծվել աշխատանքային խումբ` կառուցվածքային վերափոխման կարիքների գնահատման համար, և չի իրականացվել վարձատրության համապարփակ վերլուծություն:

Ա. Մակարյանի ամբողջական հաղորդումը կարող էք տեսնել հավելված 1-ում:

Արտահայտվեցին՝ ԵՊՀ ԻՄ տնօրեն Մ. Օթարյանը, տնօրենի խորհրդական Ա. Մակարյանը, Վ. Սարգսյանը, ԿԲՈԱ բաժնի մասնագետ, համագեկուցող, հանձնաժողովի քարտուղար Մ. Ճաղարյանը և այլք:

Մասնավորապես ԵՊՀ ԻՄ տնօրեն Մ. Օթարյանը հանդես եկավ մի շարք դիտարկումներով և հանձնարարականներով.

- Հորդորեց գիտական աշխատանքների վերլուծությունն անել ավելի բացված տարբերակով, որպեսզի պարզ լինի՝ արդյո՞ք աճը գրանցվում է նույն մարդկանց հաշվին, թե՞ նոր դասախոսներ են ներգրավվում:
- Հանձնարարեց ստեղծել աշխատանքային թիմ՝ «Կանաչ համալսարան» հայեցակարգն ամբողջացնելու համար:
- Շեշտեց, որ յուրաքանչյուր չիրականացված կետի համար պետք է պարզվի պատասխանատուն և խոչընդոտող պատճառը:

Կարճ պարզաբանումներով հանդես եկավ նաև Վարդան Սարգսյանը (ենթակառուցվածքների մասով):

Բաց քվեարկությամբ՝ 25 կողմ, 0 դեմ, 0 ձեռնպահ համամասնությամբ որոշվեց.

ՈՐՈՇՈՒՄ

- «ԵՊՀ ԻՄ զարգացման 2025-2030թթ. ռազմավարական ծրագրի 2025թ. գործողությունների պլանի կատարման մասին» հարցի վերաբերյալ ԵՊՀ ԻՄ գիտական խորհրդին կից որակի կառավարման մշտական հանձնաժողովի նախագահ՝ Ա.Ն. Մակարյանի հաղորդումն **ընդունել ի գիտություն:**

Օրակարգի երկրորդ՝ «ԵՊՀ ԻՄ-ում հետազոտական աշխատանքների իրականացումից և գնահատումից ուսանողների բավարարվածության հարցման արդյունքների մասին (2025-2026 ուստարվա 1-ին կիսամյակ)» հարցի մասին լսեցին ԵՊՀ ԻՄ գիտական խորհրդին կից որակի կառավարման մշտական հանձնաժողովի նախագահ՝ Ա.Ն. Մակարյանի հաղորդումը:

Նա նշեց, որ ԵՊՀ Իջևանի մասնաճյուղի 2025-2026 ուստարվա 1-ին կիսամյակի հետազոտական աշխատանքների իրականացումից և գնահատումից ուսանողների բավարարվածության հարցման արդյունքները բավականին ծավալուն են և վերհանում են ինչպես ձեռքբերումները, այնպես էլ համակարգային խնդիրները:

Նշվեց, որ հարցումն իրականացվել է որակի ապահովման բաժնի կողմից՝ ֆակուլտետների աջակցությամբ, և ապահովվել է 70% ընտրանք, ինչը հիմնավոր հիմք է վերլուծության համար: Հարցաշարը բաղկացած էր չորս խոշոր բաժիններից՝ բավարարվածություն բովանդակությունից և ռեսուրսներից, ուսանողի սեփական աշխատանքից, դասախոսի կողմից կազմակերպումից և գնահատումից:

Մասնավորապես ուսանողների 97%-ը նշել է, որ ծանոթ է գնահատման համակարգին, 94.5%-ը բավարարված է ստացված գնահատականներով, միայն 3.7%-ն է համարել, որ գնահատականը չի համապատասխանել իր պատկերացումներին: Բոլոր հարցված ուսանողները կարողացել են հաղթահարել առաջադրանքները: Նշվել է, որ հետազոտական աշխատանքը հիմնականում նպաստում է նոր գիտելիքների ձեռքբերմանը:

Ուսանողների մեծամասնությունը համարում է, որ ինքնուրույն է կատարել աշխատանքը, սակայն միևնույն ժամանակ նշում է դասախոսի շատ բարձր (շուրջ 80%) աջակցության մասին: Տեղեկատվության և գրականության պակասը հիմնական խնդիրն է թե՛ 3-րդ, թե՛ 4-րդ կուրսեցիների համար: Տնտեսագետ ուսանողների համար մշտական խնդիր է պաշտոնական տվյալների անհասանելիությունը և հայալեզու մասնագիտական գրականության սակավությունը: Ուսանողները դժգոհել են միաժամանակյա ծանրաբեռնվածությունից, ինչը խանգարում է դասապրոցեսին: Խմբային աշխատանքների գնահատման մեջ ուսանողները բարձրացրել են անարդար գնահատման հարցը, երբ խմբի բոլոր անդամները ստանում են նույն գնահատականը՝ անկախ անհատական ներդրումից:

Ա. Մակարյանի ամբողջական հաղորդումը կարող էք տեսնել հավելված 2-ում:

Արտահայտվեցին՝ ԵՊՀ ԻՄ տնօրեն Մ. Օթարյանը, Մանկավարժության և հոգեբանության ամբիոնի դոցենտ Լ. Հարությունյանը, Ընդհանուր մաթեմատիկայի և բնագիտության ամբիոնի դոցենտ Գ. Միմոնյանը, Վ. Պողոսյանը ԵՊՀ ԻՄ ՈՒԽ նախագահ Դ. Ալեքսանյանը, ՈՒԳԸ նախագահ Ս. Աբազյանը, ուսանող Շ. Շահնագարյանը և այլք:

Մասնավորապես Մ. Օթարյանը և Գ. Միմոնյանը նկատեցին, որ հարցումներում առկա են հակասություններ՝ ուսանողները մի կողմից նշում են բարձր ինքնուրույնության մասին (72%), մյուս կողմից՝ դասախոսի շատ բարձր աջակցության (80%): Պարոն Միմոնյանը հավելեց, որ սա բոլոր հարցումների խնդիրն է՝ ուսանողները փորձում են «իդեալական արդյունք» ցույց տալ, որպեսզի չնեղացնեն ոչ իրենց, ոչ էլ դասախոսին:

Մ. Օթարյանը փաստեց, որ տնտեսագիտության ոլորտում պաշտոնական տվյալների և հայալեզու գրականության պակասը մշտական խնդիր է: Ուսանողներից մեկն առաջարկեց, որ գրականության քիչ լինելը կարող է ուսանողին ավելի ազատ դարձնել սեփական վարկածներն առաջ քաշելու հարցում: Սակայն Ա. Մակարյանը և Մ. Օթարյանը հակադարձեցին, որ գիտական աշխատանքը պահանջում է ծանոթություն նախկին ուսումնասիրություններին՝ սեփական տեսակետը հիմնավորելու կամ հերքելու համար: Որպես լուծում՝ տնօրենն առաջարկեց ներդնել սիմուլյացիոն խաղեր (վիրտուալ բիզնես մոդելներ), ինչը թույլ կտա ուսանողներին աշխատել առանց իրական կազմակերպությունների փակ տվյալների:

Նշվեց, որ խմբային աշխատանքների ժամանակ հաճախ մեկ ուսանող է աշխատում, բայց բոլորը ստանում են նույն բարձր գնահատականը: Պարոն Միմոնյանը նշեց, որ բնագիտական առարկաներում դժվար է տարանջատել աշխատանքի փուլերը, բայց դասախոսը պետք է տեսնի յուրաքանչյուրի ներդրումը: Ա. Մակարյանը խոստացավ ներկայացնել գնահատման նոր մեթոդոլոգիա, որը ներառում է ինքնագնահատում և փոխադարձ գնահատում:

Ա. Մակարյանը նշեց, որ Հայաստանում ոչ մի բուհ դեռևս իրատեսորեն չի հաշվարկում ուսանողի հետազոտական բեռնվածությունը: Նա շեշտեց, որ դասախոսների կողմից պլանավորված ժամանակը հաճախ «ոռել չի», և անհրաժեշտ է մշակել հստակ ուղեցույցներ ուսանողի ժամանակը ճիշտ բաշխելու համար:

Քննարկման վերջում ուսանողները բարձրաձայնեցին նաև այն մասին, որ երբեմն դասախոսները չեն հետևում համալսարանի սահմանած միասնական կարգին կամ առաջադրում են սեփական պահանջները, ինչը շփոթություն է առաջացնում:

Բաց քվեարկությամբ՝ 25 կողմ, 0 դեմ, 0 ձեռնպահ, *որոշվեց*
ՈՐՈՇՈՒՄ

- «ԵՊՀ ԻՄ-ում հետազոտական աշխատանքների իրականացումից և գնահատումից ուսանողների բավարարվածության հարցման արդյունքների մասին (2025-2026 ուստարվա 1-ին կիսամյակ)» հարցի վերաբերյալ ԵՊՀ ԻՄ գիտական խորհրդին կից որակի կառավարման մշտական հանձնաժողովի նախագահ՝ Ա.Ն. Մակարյանի հաղորդումն **ընդունել ի գիտություն:**

Օրակարգի երրորդ՝ «ԵՊՀ ԻՄ 2027թ. ընդունելության մասնագիտությունների ցանկի քննարկում» հարցի մասին լսեցին ԵՊՀ ԻՄ տնօրեն Մ. Օթարյանի հաղորդումը:

Տնօրենը նշեց, ԵՊՀ ԻՄ 2027թ. ընդունելության մասնագիտությունների ցանկում էական փոփոխություններ չկան, նոր կրթական ծրագրեր չեն նախատեսվում: Քննարկման առանցքում է եղել Ինֆորմատիկայի և կիրառական մաթեմատիկայի (ԻԿՄ) հեռակա ուսուցման հարցը, որի վերաբերյալ նշվել է, որ բանակից վերադարձած երիտասարդները հաճախ չեն ցանկանում սովորել առկա համակարգում, իսկ հեռակա տարբերակի բացակայությունը կամ հնարավոր փակումը խնդրահարույց է նրանց համար: Շեշտվել է, որ քոլեջներից ևս լինում են սակավաթիվ դիմորդներ (2-3 հոգի), ովքեր պետք է ուսումը շարունակեն ԻԿՄ առաջին կամ երկրորդ կուրսերում:

Զուգահեռաբար անդրադարձ է կատարվել բնապահպանության և բնօգտագործման մասնագիտության հեռակա ուսուցման հնարավորությանը, քանի որ ձևավորվող էկոպարեկային ծառայության պատճառով կարող է պահանջարկ առաջանալ: Մակայն տնօրենը հիշեցրել է նախկին բացասական փորձը, երբ միասնական քննությունների (կենսաբանություն) պատճառով 40 դիմորդից ոչ մեկը չէր կարողացել հաղթահարել դրական շեմը:

Արտահայտվեցին՝ ԵՊՀ ԻՄ տնօրենի խորհրդական Ա. Մակարյանը, Կիրառական արվեստի ֆակուլտետի դեկանի պաշտոնակատար Վ. Աղաբաբյանը, դոցենտ Գ. Միմոնյանը և այլք:

Մասնավորապես Գ. Միմոնյանը տեղեկացրեց, որ ֆակուլտետում տեղի է ունեցել օնլայն նիստ, որտեղ առաջարկվել է «Բնապահպանություն և բնօգտագործում» մասնագիտությունը ներառել 2027թ. հեռակա ուսուցման ցանկում, քանի որ մասնաճյուղն ունի համապատասխան լիցենզիան: Միաժամանակ նա հարց է բարձրացրել այն մասին, թե արդյոք դիմորդները կկարողանան հանձնել կենսաբանություն առարկայի միասնական քննությունը:

Քննարկման արդյունքում որոշվել է հավանություն տալ հիմնական ցանկը(տես հավելված 3), իսկ ԻԿՄ և բնապահպանության հեռակա ուսուցման վերաբերյալ լրացուցիչ խորհրդակցություններ անցկացնել համալսարանի գործընկերների և պոտենցիալ գործատուների հետ:

Բաց քվեարկությամբ՝ 25 կողմ, 0 դեմ, 0 ձեռնպահ, *որոշվեց*
ՈՐՈՇՈՒՄ

1. «ԵՊՀ ԻՄ 2027թ. ընդունելության մասնագիտությունների ցանկի քննարկում» հարցի վերաբերյալ Մ.Օթարյանի զեկուցումն ընդունել ի գիտություն:
2. Հավանություն տալ ԵՊՀ ԻՄ 2027թ. ընդունելության մասնագիտությունների ցանկը՝ համաձայն հավելված 3-ի:

Օրակարգի չորրորդ` «ԵՊՀ ԻՄ տուրիզմի կառավարման և մշակութաբանության ամբիոնի ասիստենտ, տնտեսագիտության թեկնածու Սմբատ Յուցուլյանին ԵՊՀ գիտական խորհրդում դոցենտի գիտական կոչում ստանալու համար երաշխավորելու և միջնորդելու մասին» հարցի մասին լսեցին ԵՊՀ ԻՄ գիտական քարտուղար, մրցութային հանձնաժողովի նախագահ Մ. Աթոյանի հաղորդումը:

Նա նշեց, որ ԵՊՀ ԻՄ մրցութային հանձնաժողովը մանրամասն ուսումնասիրելով հայցողի անձնական գործի նյութերը` արձանագրել է հետևյալը.

ԵՊՀ ԻՄ տուրիզմի կառավարման և մշակութաբանության ամբիոնի ասիստենտ, տնտեսագիտության թեկնակծու, Սմբատ Յուցուլյանը 2018թ.-ից իրականացնում է մասնագիտությանը համապատասխան գործունեություն, մասնավորապես վերջին 3 ուսումնական տարիների ընթացքում (2022-2025թթ.) աշխատում է ԵՊՀ ԻՄ «Տուրիզմի կառավարման և մշակութաբանության» ամբիոնում որպես ասիստենտ, 0,25 դրույքով: Սմբատ Յուցուլյանը թեկնածուական ատենախոսությունը պաշտպանել է 2013թ. հուլիսի 3-ին (վկայագիր Ա № 06667): Նա ունի հրատարակված 41 աշխատանք, ընդ որում` 30 գիտական հոդված, 1 ուսումնամեթոդական հոդված և 1 ուսումնամեթոդական ձեռնարկ հրատարակվել են ատենախոսության պաշտպանությունից հետո:

ԵՊՀ ԻՄ Տուրիզմի կառավարման և մշակութաբանության ամբիոնի ասիստենտ, տնտեսագիտության թեկնակծու, Սմբատ Յուցուլյանին դոցենտի գիտական կոչում շնորհելու հարցը քննարկվել է ԵՊՀ ԻՄ-ի Տուրիզմի կառավարման և մշակութաբանության ամբիոնի 2026թ. մարտի 7-ի թիվ 8 նիստում:

Հաշվի առնելով այդ ամենը կարելի է արձանագրել, որ ԵՊՀ ԻՄ-ի Տուրիզմի կառավարման և մշակութաբանության ամբիոնի ասիստենտ, տնտեսագիտության թեկնակծու, Սմբատ Յուցուլյանի գիտամանկավարժական գործունեության տվյալները բավարար են դոցենտի գիտական կոչում ստանալու համար սահմանված գործընթացին մասնակցելու համար` համապատասխանում են Հայաստանի Հանրապետության կառավարության 2001թ. հուլիսի 9-ի N 615 որոշմամբ հաստատված «Հայաստանի Հանրապետությունում գիտամանկավարժական կադրերին պրոֆեսորի և դոցենտի գիտական կոչումներ շնորհելու մասին կարգ»-ի 5-րդ` «Դոցենտի գիտական կոչում կարող է շնորհվել» կետի 2)-րդ ենթակետի` «2) գիտությունների թեկնածուի գիտական աստիճան ունեցող անձանց, որոնք գիտական կոչում շնորհող բուհում վերջին 3 ուսումնական տարվա ընթացքում անընդմեջ իրականացրել են հայցվող գիտական կոչման մասնագիտությանը համապատասխան գիտամանկավարժական գործունեություն և թեկնածուական ատենախոսություն պաշտպանելուց հետո տվյալ բնագավառում ունեն հրատարակված ինչպես գիտական, այնպես էլ ուսումնամեթոդական աշխատանք, որոնց ընդհանուր թիվն առնվազն 3 է.», ինչպես նաև կարգի 7-րդ կետում նշված նորմատիվային փաստաթղթերի պահանջներին` «7. Գիտական կոչում ստանալու համար անձը դիմում է ներկայացնում բուհի ռեկտորի կամ կազմակերպության տնօրենի անունով, որտեղ հիմնական աշխատող է, կամ համատեղությամբ աշխատող է` առնվազն 150 ակադեմիական ժամ ժամավճարով: Դիմումին կցվում են անհրաժեշտ փաստաթղթեր (Ցանկ 1)»:

Այնուհետև կազմվեց հաշվիչ հանձնաժողով հետևյալ կազմով` ընդհանուր մաթեմատիկայի և բնագիտության ամբիոնի դոցենտ Գ. Միմոնյան, պատմության և հասարակագիտության ամբիոնի վարիչ Ա. Ազատյան, ուսանող Շ. Շահնագարյան և կազմակերպվեց փակ գաղտնի քվեարկություն:

Փակ գաղտնի քվեարկության արդյունքները ներկայացրեց հանձնաժողովի նախագահ Գ. Միմոնյանը:

Նա նշեց, որ քվեարկությանը մասանակցել են գիտական խորհրդի 25 անդամներ, Սմբատ Յուցուլյանին երաշխավորելու համար կողմ քվեարկել 25, դեմ՝ 0 :

Բաց քվեարկությամբ՝ 25 կողմ, 0 դեմ, 0 ձեռնպահ, որոշվեց

ՈՐՈՇՈՒՄ

- Հաստատել փակ(գաղտնի) քվեարկության արդյունքները:

Արդյունքում որոշվեց.

ՈՐՈՇՈՒՄ 90/1

Հաշվի առնելով, որ ԵՊՀ ԻՄ տուրիզմի կառավարման և մշակութաբանության ամբիոնի ասիստենտ, տնտեսագիտության թեկնակծու, Սմբատ Յուցուլյանի գիտամանկավարժական գործունեության տվյալները լիովին համապատասխանում են Հայաստանի Հանրապետության կառավարության 2001թ. հուլիսի 9-ի N 615 որոշմամբ հաստատված «Հայաստանի Հանրապետությունում գիտամանկավարժական կադրերին պրոֆեսորի և դոցենտի գիտական կոչումներ շնորհելու մասին կարգ»-ի 5-րդ՝ «Դոցենտի գիտական կոչում կարող է շնորհելը» կետի 2)-րդ ենթակետին, ինչպես կարգի 7-րդ կետում նշված նորմատիվային փաստաթղթերի պահանջներին, ղեկավարվելով «Երևանի պետական համալսարան» հիմնադրամի Իջևանի մասնաճյուղի կանոնադրության 23-րդ կետի 20-րդ ենթակետով և «Երևանի պետական համալսարան» հիմնադրամի Իջևանի մասնաճյուղի գիտական խորհրդի աշխատակարգի 4-րդ կետի 20-րդ ենթակետով՝ «Երևանի պետական համալսարան» հիմնադրամի Իջևանի մասնաճյուղի գիտական խորհուրդը որոշում է.

1. Երաշխավորել «Երևանի պետական համալսարան» հիմնադրամի Իջևանի մասնաճյուղի տուրիզմի կառավարման և մշակութաբանության ամբիոնի ասիստենտ, տնտեսագիտության թեկնակծու, Սմբատ Յուցուլյանին դոցենտի գիտական կոչում ստանալու համար:
2. Միջնորդել ԵՊՀ գիտական խորհրդին՝ ԵՊՀ ԻՄ տուրիզմի կառավարման և մշակութաբանության ամբիոնի ասիստենտ, տնտեսագիտության թեկնակծու Սմբատ Յուցուլյանին շնորհել դոցենտի գիտական կոչում և համապատասխան առաջարկով դիմել ՀՀ ԲՈԿ:

Ընթացիկ հարցեր:

5.1. Օրակարգի «Երևանի պետական համալսարան» հիմնադրամի Իջևանի մասնաճյուղի օտար լեզուների ամբիոնի դոցենտ Մարատ Զուրաբյանի և Հայոց լեզվի և գրականության ամբիոնի դոցենտ Մուշեղ Սարուխանյանի համահեղինակությամբ «Բառերի բուլգակովյան աշխարհը. Ռուս-հայերեն ստուգաբանական բառարան» ձեռնարկը երաշխավորելու մասին» հարցի վերաբերյալ լսեցին ԵՊՀ ԻՄ *մեթոդական խորհրդի նախագահ Ա. Հ. Մակարյանի* զեկույցը:

Մակարյանը նշեց, որ այս աշխատանքը բավականին երկար պատմություն ունի և հիմնված է Մ. Զուրաբյանի թեկնածուական ատենախոսության շրջանակներում կատարված ուսումնասիրությունների վրա: Այն շուրջ 250 էջանոց ծավալուն ձեռնարկ է, առաջարկեց ձեռնարկը հստակեցնել որպես «ուսումնասօժանողակ ձեռնարկ»: Նա աշխատանքը

բնութագրվեց որպես օրիգինալ ուսումնասիրություն, որի հիմքում ընկած է Միխայիլ Բուլգակովի հայտնի «Վարպետը և Մարգարիտան» վեպը: Ձեռնարկում տրվում է ռուսերեն և հայերեն տեքստերի համատեղ մեկնաբանություն, մասնավորապես՝ տերմինների, եզրույթների և պատմական կերպարների ստուգաբանական վերլուծություն:

Նշվեց, որ ձեռնարկն արդեն անցել է քննարկման բոլոր անհրաժեշտ փուլերը՝ ամբիոններում, ֆակուլտետի գիտական և մեթոդական խորհուրդներում, ինչպես նաև ստացել է անհրաժեշտ գրախոսականներն ու ռեցենզիաները: Ա. Մակարյանը նշեց, որ հեղինակներն առաջարկել են ձեռնարկը հրատարակել սեփական ֆինանսական միջոցների հաշվին (ինքնաֆինանսավորմամբ):

Զեկույցի ավարտին Ա. Մակարյանն առաջարկեց երաշխավորել ձեռնարկը հրատարակության, ինչը միաձայն ընդունվեց խորհրդի կողմից:

Բաց քվեարկությամբ՝ 25 կողմ, 0 դեմ, 0 ձեռնպահ, որոշվեց

ՈՐՈՇՈՒՄ N 90/2

Ղեկավարվելով «Երևանի պետական համալսարան» հիմնադրամի Իջևանի մասնաճյուղի կանոնադրության 23-րդ կետի 17-րդ ենթակետով և «Երևանի պետական համալսարան» հիմնադրամի Իջևանի մասնաճյուղի գիտական խորհրդի աշխատակարգի 4-րդ կետի 17-րդ ենթակետով՝ «Երևանի պետական համալսարան» հիմնադրամի Իջևանի մասնաճյուղի գիտական խորհուրդը որոշում է.

1. «Երևանի պետական համալսարան» հիմնադրամի Իջևանի մասնաճյուղի օտար լեզուների ամբիոնի դոցենտ Սարատ Զուրաբյանի և Հայոց լեզվի ամբիոնի դոցենտ Մուշեղ Սարուխանյանի համահեղինակությամբ «Բառերի բուլգակովյան աշխարհը. Ռուս-հայերեն ստուգաբանական բառարան» ուսումնասովանողական ձեռնարկը երաշխավորել հրատարակման:
2. Որոշումն ուժի մեջ է մտնում ընդունման պահից:

ԳԻՏԱԿԱՆ ԽՈՐՀՐԴԻ ՆԱԽԱԳԱՀ՝ _____ Մ. Մ. ՕԹԱՐՅԱՆ

ԳԻՏԱԿԱՆ ԽՈՐՀՐԴԻ ՔԱՐՏՈՒՂԱՐ՝ _____ Մ. Ս. ԱԹՈՅԱՆ